

Na osnovu člana 21. stav 3. Zakona o raseljenim licima i povratnicima u Federaciji Bosne i Hercegovine i izbjeglicama iz Bosne i Hercegovine ("Službene novine Federacije Bosne i Hercegovine", broj: 15/05) i Plana povratka, obnove, gradnje i razvoja održivosti povratka za 2026. godine, usvojen Zaključkom Vlade Federacije BiH, V. broj: 296/2026 od 06.3.2026. godine, Federalno ministarstvo raseljenih osoba i izbjeglica, objavljuje

## **Javni poziv za programe podrške očuvanju radnih mjesta povratnika u entitetu Republika Srpska za 2026. godinu**

### **I - PREDMET JAVNOG POZIVA**

- A) Program 1 - Podrška očuvanju radnih mjesta i unapređenje uslova rada povratnika u poslovnim subjektima u privatnom vlasništvu, i to: mikro, malim i srednjim preduzećima, obrtima, komercijalnim poljoprivrednim gazdinstvima, zadrugama i zadružnim savezima za 2026. godinu, namjenjen poslovnim subjektima sa prostora bosanskohercegovačkog entiteta Republika Srpska, koji u prethodnoj godini nisu bili korisnici sredstava, po Javnom pozivu za podršku očuvanju radnih mjesta i unapređenju uslova rada povratnika u 2025. godini;
- B) Program 2 - Podrška očuvanju radnih mjesta povratnika kroz refundiranje troškova poreza i doprinosa, za mjesec januar, februar i mart 2026. godine, za vjerske organizacije i pravne subjekte koji su u vlasništvu vjerskih zajednica, koji djeluju u povratničkim sredinama na prostoru bosanskohercegovačkog entiteta Republika Srpska.

### **II – CILJ JAVNOG POZIVA**

Cilj javnog poziva je pružanje podrške očuvanju postojećih radnih mjesta za uposlene iz kategorije povratnika koji spadaju u manjinski zastupljene populacije, u skladu sa Aneksom VII, član 1. tačka 3. stav d) Općeg okvirnog sporazuma za mir u Bosni i Hercegovini, a prema posljednjem popisu stanovništva u Bosni i Hercegovini iz 2013. godine, radi podrške održivom povratku.

### **III – PRAVO UČEŠĆA**

(1) Pravo apliciranja za Program 1 imaju poslovni subjekti:

- a) koji su danom apliciranja registrovani po važećim zakonskim propisima, a kvalifikuju se kao mikro, mala, srednja preduzeća ili samostalni preduzetnici, obrti, trgovačke radnje, komercijalna poljoprivredna gazdinstva, te zadruge i zadružni savezi;
- b) koji danom objave javnog poziva imaju najmanje 1 (jednog) a najviše 249 prijavljenih uposlenika (klasifikacija u skladu sa važećim propisima o računovodstvu i reviziji), gdje se broj uposlenika odnosi na ukupan broj uposlenih radnika na nivou cijelog poslovnog subjekta, uključujući sve registrovane poslovne jedinice i/ili podružnice, od čega minimalno jednog uposlenika iz kategorije manjinskih povratnika;
- c) koji imaju sjedište ili registrovanu poslovnu jedinicu na području bosanskohercegovačkog entiteta Republika Srpska;
- d) koji po Javnom pozivu za podršku očuvanju radnih mjesta i unapređenju uslova rada povratnika u 2025. godini, nisu bili korisnici sredstava.

(2) Pravo apliciranja za Program 2. imaju vjerske organizacije, kao i pravni subjekti koji su u njihovom vlasništvu:

- a. koji su danom apliciranja po važećim zakonskim propisima registrirani za djelovanje na prostoru bosanskohercegovačkog entiteta Republika Srpska;
- b. koji danom apliciranja imaju jednog (1) i više prijavljenih zaposlenika, od čega minimalno jednog iz kategorije manjinskih povratnika.

#### **IV – OGRANIČENJE UČEŠĆA**

U ovom javnom pozivu ne mogu učestvovati javne institucije, ustanove i javna preduzeća, poslovni subjekti kojima su u 2025. godini, od strane Federalnog ministarstva raseljenih osoba i izbjeglica, odobrena sredstva po Javnom pozivu za podršku očuvanju radnih mjesta i unapređenju uslova rada povratnika, kao i oni koji u prethodnih 10 godina nisu ispunili ugovorene obaveze prema Federalnom ministarstvu raseljenih osoba i izbjeglica po ranijim javnim pozivima i programima.

#### **V – OPĆI KRITERIJI I POTREBNA DOKUMENTACIJA**

(1) Aplikanti na Javni poziv, za Program 1 obavezni su dostaviti sljedeće dokumente:

1. Čitko popunjen, potpisan i ovjeren pečatom aplikanta prijavni obrazac, koji je dostupan na internet stranici Ministarstva <https://fmroi.gov.ba/> ili se može preuzeti lično u Ministarstvu, na adresi Hamdije Čemerlića br. 2., Sarajevo;
2. Rješenje o registraciji izdato od nadležnog organa (original ili ovjerena kopija izdato od strane nadležnog organa ne starije od 30 dana);
3. Uvjerenje o poreskoj registraciji (ID/JIB broj) aplikanta (dostaviti običnu kopiju Uvjerenja/potvrde u 2 primjerka);
4. Potvrda banke da aplikant ima aktivan transakcijski račun (potvrda sa brojem računa izdata od strane banke ne starija od 3 mjeseca - dostaviti običnu kopiju potvrde u 2 primjerka);
5. Uvjerenje o izmirenim porezima i doprinosima kao dokaz da aplikant nema dugovanja za obaveze po osnovu direktnih poreza i doprinosa izdato od nadležne Poreske uprave (dostaviti original ili ovjerenu kopiju, uvjerenje izdato od strane nadležnog organa ne starije od 30 dana);
6. Lista osiguranih uposlenika kod aplikanta na dan objave ovog javnog poziva izdata od nadležne Poreske uprave (original ili ovjerena kopija izdata od strane nadležnog organa ne starija od 30 dana);
7. Uvjerenja o povratku za uposlene povratnike za čiju podršku u očuvanju radnih mjesta i unapređenju uslova rada se aplicira (original ili ovjerena kopija izdata od strane nadležnog organa ne starija od 30 dana).

(Napomena: Iznimno za aplikante registrovane kao komercijalna poljoprivredna gazdinstva, a s obzirom na različitost u formi dokumenata koji se ovim subjektima izdaju u pojedinim lokalnim zajednicama, validnim će se smatrati dokumentacija koja može biti ekvivalent traženoj dokumentaciji koju dostavljaju ostali poslovni subjekti).

(2) Aplikanti na Javni poziv, za Program 2, obavezni su dostaviti sljedeće dokumente:

1. Čitko popunjen, potpisan i ovjeren pečatom aplikanta prijavni obrazac, koji je dostupan na internet stranici Ministarstva <https://fmroi.gov.ba/> ili se može preuzeti lično u Ministarstvu, na adresi Hamdije Čemerlića br. 2., Sarajevo;
2. Rješenje o registraciji izdato od nadležnog organa (original ili ovjerena kopija izdato od strane nadležnog organa ne starije od 30 dana);
3. Uvjerenje/potvrda o poreskoj registraciji kod Porezne uprave – JIB broj (dostaviti običnu kopiju Uvjerenja/potvrde u 2 primjerka);
4. Dokaz da poslovni subjekt posjeduje aktivan transakcijski račun (potvrda sa brojem računa izdata od strane banke ne starija od 3 mjeseca - dostaviti običnu kopiju potvrde u 2 primjerka);

5. Potvrda/uvjerenje o ostvarenom povratku za sve uposlene manjinske povratnike, (original ili ovjerena kopija) izdata/ovjerena od strane nadležnog organa za općinu povratka, ne starija od 30 dana (prihvatljiva je i zbirna potvrda sa listom radnika, kao i pojedinačne potvrde), a iznimno će se uvažiti i pismena preporuka iz vrhovne vjerske institucije za lica na službi u vjerskim ustanovama u manjinskim povratničkim zajednicama (original ili ovjerena kopija ne starije od 30 dana);
6. Dokaz o broju zaposlenih lica: Lista osiguranih lica za obveznika izdata od nadležne Poreske uprave );
7. Obrazac prijave poreza i doprinosa (1002) za mjesec januar, februar i mart 2026. godine i dokazi o uplatama istih (izvodi ili uplatnice).

## **VI – FINANSIJSKA SREDSTVA**

Odobrena sredstva po jednom uposlenom povratniku, za Programe 1 i 2, utvrdiće se prema broju prijava koje će ispuniti uslove javnog poziva i biti objavljene na konačnoj listi.

Ukupan iznos planiranih sredstava za realizaciju ovog javnog poziva je do 1.500.000,00 KM.

Sredstva po ovom javnom pozivu će se doznačiti jednokratno nakon potpisivanja ugovora o namjenskom korištenju sredstava, na transakcijski račun korisnika.

## **VII – OBAVEZE KORISNIKA**

Korisnici sredstava za Program 1, sa kojima bude zaključen ugovor o namjenskom korištenju budžetskih sredstava, se obavezuju:

Da uposlenim povratnicima (uključujući i vlasnika ukoliko se nalazi na Listi osiguranih lica) za koje dobiju sredstva, isplate najmanje 10% (ili veći iznos, sve do 100%) od doznačenih sredstava po uposleniku (neto iznos) kao dodatni prihod, pored plate i naknada po osnovu rada;

– Da sredstva utroše namjenski u razvoj poslovanja, i to za nabavku stalnih sredstava te proširenje i/ili adaptaciju poslovnih prostorija.

– Korisnik može do 5% od ukupnog iznosa pravdati kao troškove redovnog poslovanja (komunalni troškovi i/ili troškovi zakupa poslovnih prostorija).

– Da će u ugovorenom roku Ministarstvu dostaviti izvještaj o namjenskom korištenju budžetskih sredstava.

## **VIII - NAČIN IZBORA KORISNIKA I POSEBNI KRITERIJI**

Izbor korisnika po osnovu ovog javnog poziva vršit će posebna komisija koju imenuje federalni ministar raseljenih osoba i izbjeglica. Komisija će razmatrati prijave u skladu sa odredbama ovog javnog poziva i procedurama za izbor korisnika.

## **IX – ROK ZA PRIJAVE I NAČIN PODNOŠENJA PRIJAVA**

Prijavni obrazac sa traženom dokumentacijom dostaviti lično ili poštom preporučeno, na adresu:

**Federalno ministarstvo raseljenih osoba i izbjeglica**

**Hamdije Čemerlića 2**

**71000 Sarajevo**

sa naznakom

“Prijava na Javni poziv za podršku očuvanju radnih mjesta povratnika – entitet RS”

(Na poleđini koverta navesti naziv podnosioca, adresu i kontakt telefon)

Rok za prijave je **04.05.2026. godine.**

## **X - PRIKUPLJANJE I OBRADA LIČNIH PODATAKA**

Podnošenjem prijave na ovaj javni poziv, podnosilac daje saglasnost Federalnom ministarstvu raseljenih osoba i izbjeglica za obradu svojih ličnih podataka, u skladu sa Zakonom o zaštiti ličnih podataka. Lični podaci se obrađuju isključivo radi provjere ispunjenosti uslova javnog poziva, izrade ugovora, realizacije dodjele pomoći, vođenja evidencije korisnika i izvršenja plaćanja. Podaci se mogu dostaviti trećim stranama samo u okviru zakonskih obaveza. Radi transparentnosti postupka i ostvarivanja prava na žalbu/prigovor po javnom pozivu, minimalno neophodni lični podaci korisnika bit će objavljeni na službenoj internet stranici Ministarstva. Podnosilac ima pravo da zatraži pristup, ispravku, brisanje ili ograničenje obrade svojih podataka, u skladu sa zakonom.

## **XI – INFORMACIJE O JAVNOM POZIVU**

Dodatne informacije o javnom pozivu se mogu dobiti putem kontakt telefona: 033/294-140 i 033/294-139.

Prelimarna i konačna rang lista po ovom javnom pozivu će biti objavljene na internet stranici Federalnog ministarstva raseljenih osoba i izbjeglica <https://fmroi.gov.ba/>

Broj: 04-32-4-14-1/26  
Sarajevo, 02.04.2026. godine

MINISTAR

Nerin Dizdar